




閩媛典第一百六十卷

閩節部列傳四十二

明三十七 蔡玉章妻歐陽氏

按衡州府志歐陽氏名珊蕊衡陽人巫山令歐陽來女諸生蔡玉章妻年十六歸蔡越四載章亡無嗣舅姑老力奉晨昏有死無二毀容敝服家人見之莫不感咽嘉靖丁酉氏年三十九侍御劉公黻爲之傳苦節終身

陳爵妻單氏

按衡州府志單氏名川娘衡山單彥女年十七適安仁陳爵以敬戒慈惠稱於族越十年爵死子廷佩甫五歲或諷改適氏唾之撫廷佩成立補某衛經歷氏年七十餘終

李春葵妻段氏

按衡州府志段氏名壯貞安仁人年十七歸李春葵生女甫數月葵死無子段苦節事姑勤儉操作積餘資建二石橋以濟徒步年七十終

陳思桂妻李氏

按衡州府志李氏名二貞安仁義官李勝紀女歸諸生陳思桂思桂爵同母弟也生二女無子思桂沒李誓不嫁與爵妻單共守終身

周孟安妻樊氏

按衡州府志樊氏名季秀安仁樊廷珪女年十七適周孟安生子甫四載安患瘧疾樊侍湯藥惟謹焚祝願以身代及安亾氏年二十七斷指刺血誓不他適敬事舅姑擇師教子鳴鳳餽於庠事聞有司旌之卒年九十一

劉弘妻陳氏

按衡州府志陳氏衡山陳均庭女年二十適安仁劉弘越六載夫亡舅姑欲再嫁之不從居深屏息言笑不聞撫從子青圭爲嗣嘉靖九年終

彭嗣銀妻尹氏

按衡州府志尹氏桂陽州彭嗣銀妻性素孝善事父母既嫁尤孝翁姑未幾夫暴亡尹年二十六生

子如萬甫九月家人欲奪其志尹以死自誓苦守如萬成人年八十四卒

鄧顥繼妻魏氏

按衡州府志魏氏桂陽州鄧顥後妻適鄧未暮而寡撫前室子廷春如己出孀居數十年嘉靖辛亥州守林垠請旌之卒年八十

黃曇妻雷氏

按衡州府志雷氏桂陽州雷友保女年十八適黃曇生子天錫夫亡雷年二十八矢志守節誓與子俱存亡嘉靖中年八十餘旌表

何佃妻歐陽氏

龐氏附

按衡州府志歐陽氏桂陽州鄉舉何佃妻有賢行佃亡氏年二十三與側室龐氏撫夫姪爲子嫡庶共寢處數十年州守爲建雙節坊旌之

黃顥妻雷氏

媳陳氏附

按衡州府志雷氏桂陽州人年十七適黃顥踰年生子廷秀甫七齡夫亡雷年二十四家貧苦節以

紡績自給秀長娶陳氏生孫而秀又沒雷抱孫泣語陳曰吾與若共育此雛以續黃氏祀能乎陳嗚咽請如命雷年八十二陳年六十姑媳不離跬步州守表其門

尹憲寬妻陳氏

按衡州府志陳氏桂陽州人尹憲寬妻寬亡三子俱幼陳年二十八或諷他適陳厲聲叱之諷者慙退茹荼守志養祖翁姑盡孝年八十有司顏其堂曰節孝

夏國祚妻楊氏

按衡州府志楊氏桂陽州夏國祚妻年及笄來歸越四載夏亡遺孤未晬楊觸石幾絕旣自惟曰姑老兒方在抱孰與任其責也乃收淚治喪畢永屏膏沐勤女工以養姑課子力學子尋補弟子員餼於庠邑令表其廬學使者復旌之

譚元宗妻段氏

按衡州府志段氏衡陽譚仟母仟父元宗家素貧業醫以給朝夕及元宗沒遺三子長仟次僕及妾子仕皆次第懷抱間段年三十含悲茹苦惟冀三孤速成鄰人欲謀其故宅侵侮備至段不爲意久

之家益窘人咸勸其改適段指天誓曰吾不卽死以三孤未立也寧有他志乎苦守數十年不渝嘉靖戊午僕舉於鄉越乙丑段終年七十六

張鵬翼妻段氏

按衡州府志段氏衡陽張鵬翼妻年十六適張會翁沒氏盡發其妝以殮嘉靖甲午夫以鄉闈失意病亡客邸訃至段解帶自經母毛氏覺救之復甦不食七日強起撫孤凡二十七年而卒

王賞妻甯氏 陳鳩妻蔡氏

按衡州府志甯氏郡諸生王賞妻年二十四方娠而賞歿甯誓不獨生或勸俟挽身尋果生男遂撫之縞纈終身足不踰閭年七十終 按衡州府志蔡氏名晚香安仁陳鳩妻年二十二夫沒無子苦節四十年終

侯義旒妻譚氏 鄧璉妻尙氏

按衡州府志譚氏名六貞安仁侯義旒妻旒父爵爲感恩令苗賊胡南蛇反旒代父出征陣亡無子譚年二十一幾以身殉久之有顯者將求婚譚截髮示志年七十餘卒 按零陵縣志尙氏鄧璉

妻年十九夫亡誓不更適哺幼子孀居六十四年嘉靖改元收入武宗實錄

王清妻唐氏

鄧希周妻唐氏

按零陵縣志唐氏邑諸生王清妻年二十九夫亡子寬甫八歲貧苦萬狀族豪百計侵虐唐以死誓紡績撫孤成人守節五十六年郡守旌表 按零陵縣志唐氏鄧希周妻年二十四夫亡誓不再適日事績紡以撫幼孤奉翁姑郡縣以聞旌表

徐有爲妻王氏

按零陵縣志王氏邑人王崇德女徐有爲妻年二十夫亡誓志守節撫孤成人太守王翰免其子敦孝役其祖母唐氏亦節婦也初崇德嘗司訓贛州寄詩其女云祖妣唐孀人孀操誰與伍且喜吾孀女亦能肖我祖不愛事繁華寧甘守清苦終始能勉旃芳名垂萬古王氏善體父志卒能繼其祖母

蔣如柏妻伍氏

按零陵縣志伍氏諸生蔣如柏妻夫亡家貧奉姑盡孝教子勤學孀居五十年苦節如一日有司各賜絹帛表其門年八十餘子遇春舉明經孫尙榮登進士

王定燭妻胡氏

按零陵縣志胡氏南渭王定燭妻夫亡年二十二子長二歲次遺腹氏哀毀骨立育二孤成人性樂施予兩被回祿獨所居一室無恙郡守請旌之

喬祿妻唐氏

唐京理妻李氏

胡益周妻龔氏

按東安縣志唐氏喬祿妻年十九祿亡杜門自守家貧以紡績爲活撫育二子皆早喪又撫幼孫始終一節年七十終

按東安縣志李氏生員唐京理妻年二十七理亡無子矢志終身縣令旌表

按東安縣志龔氏胡益周妻夫早世無嗣氏誓不再適甘貧守志事老姑盡孝縣令表其門

夏質妻唐氏

李志倫妻文氏

林德賓妻曹氏

按東安縣志唐氏夏質妻年二十八質亡家貧無子苦節終身

按東安縣志文氏李志倫妻年

二十五倫亡撫幼子苦節四十五年終

按東安縣志曹氏林德賓妻年二十四賓亡矢志撫孤

年九十有八嘉靖改元詔賜米帛優之

唐勝瑛妻陳氏

陳景茂妻鄧氏

喬重妻劉氏

按東安縣志陳氏唐勝瑛妻年二十三瑛亡撫遺腹子力貧事姑人稱節孝 按東安縣志鄧氏

陳景茂妻年二十茂亡苦守二幼子紡績以事其姑縣令旌表 按東安縣志劉氏舍餘喬妻

嫁重六閨月夫亡遺腹生女永屏膏沐却請召事姑孝謹縣令旌之

鄧任妻秦氏 鄧勝妻舒氏

按東安縣志秦氏生員鄧任妻年二十六任亡撫孤成立奉寡姑終老縣令旌之 按東安縣志

舒氏鄧勝妻年二十四勝亡苦節撫子咸克成立

陳澄妻周氏 徐時述妻蒲氏

按永明縣志周氏陳澄妻年三十夫亡氏矢志堅貞誓不他適撫孤學恭成立訓以義方家貧惟日

紡績以供膏火學恭總角卽爲諸生 按永明縣志蒲氏貢士徐時述妻述肄業成均沒於京氏

年三十撫遺孤日省僅四齡家貧績紉事姑孝謹督課子孫垂老不怠

蒲以惟妻周氏 婦附

按永明縣志周氏蒲以惟妻年二十七惟沒子秉捷方六歲周氏苦守成立亦娶於周未幾捷亡悲

婦年少曲諷之嫁婦泣曰微姑且死守矧姑在乎遂以從兄子蒲輅爲後矢志與姑共孀居閱三十餘年並如金石

徐濂妻蒲氏

按永明縣志蒲氏名素嫦給諫之女新喻丞子徐濂妻性仁孝克修婦道翁以窮措大領恩選辟二上公車蒲悉傾妝奩資其往返事繼姑待夫異母弟盡誠年二十二生一女夫偶與里豪睚眦相角竟被傷而殞氏痛絕求死屢解不從忽泣而嘆曰兇首未懸亦何顏從夫地下日夜哀號思得甘心焉仇竟畏罪自刎蒲遂守節終身有司嘉其行檄表焉屢遇亂離卒保無恙雖奇男子何以加焉

唐本固妻義氏

按永明縣志義氏興化鄉人嘉靖三年適唐本固年二十四夫亡遺孤一歲父憐之強改嫁不從願撫孤以存祀孀居貧老持身謹嚴金石之堅冰玉之潔臭可比擬有司表其門

陳廷策妻周氏

媳附

按永明縣志周氏允平鄉人適陳廷策年二十二夫亡誓不更嫁撫孤成人家貧紡績度日志操愈

堅子早喪與婦共守遺腹孫終老有司表其門

陳思性妻歐陽氏

尹氏蒲氏附

按永明縣志歐陽氏省祭陳思性妻性謁銓攜妻妾及穉子邦鉞同往性沒於京歐陽與妾尹氏扶柩還鄉中流覆舟各執帆架得濟時鉞纔五歲與柩俱溺他舟救至倉皇拯其嬰兒棺則任浮沉焉鉞乃復赴水扳棺號泣衆皆憐之併援柩登岸旣旋里相依守貧教鉞勤學鉞生而穎敏年十四爲諸生娶蒲氏鉞尋亡遺子澍四齡泓二齡而二姑老且病蒲年二十餘勤儉紡績以承菽水勸澍泓讀書兄弟同案入庠子孫世爲文人

黃灝妻李氏

彭萬忠妻楚氏

李謨妻岳氏

姚氏附

按永興縣志李氏李易女適諸生黃灝灝沒無子易已亡氏熒獨無歸苦守四十餘年卒

按永

興縣志楚氏諸生彭萬忠妻歸三年夫沒氏年二十家貧矢不二志貢士某求爲繼室氏毀容却之

至老無怨

按南昌郡乘岳氏寧州李謨妻年二十四謨亡守節撫孤仲薰娶姚氏爲婦未幾仲

薰復沒姚年十九姑婦食貧相依爲命鄉人憐之

黃一清妻游氏

金曰榮妻孫氏

陳傑八妻李氏

按南昌郡乘游氏豐城黃一清妻年二十三而寡守節終身嘉靖間旌表

按南昌郡乘孫氏新

建金曰榮妻年二十二而寡長子應輝三歲次子應隆纔八月孫勵志守節食貧撫孤艱苦萬狀後

孫銑舉進士嘉靖間旌其門

按南昌郡乘李氏奉新陳傑八妻年二十一而寡觸棺幾死越四

月遺腹生子誥紡績易糲以養姑屏足不出庭戶孀居四十三年

李鑰妻龔氏

方來賀妻陶氏

陳沛妻章氏

按南昌郡乘龔氏李鑰妻年二十夫亡守節撫孤登嘉靖癸丑進士奉詔旌表封安人

按南昌

郡乘陶氏新建諸生方來賀妻年十七歸來賀越四載夫沒止遺腹一子拮据撫育孝事繼姑嘗剖

股以瘳其疾

按南昌郡乘章氏寧州陳沛妻年二十四夫亡守節終身

石勝安妻黃氏

幸善繼妻車氏

按南昌郡乘黃氏寧州石勝安妻年二十二夫亡守節白首無二

按南昌郡乘車氏寧州幸善

繼妻年二十六夫亡守志不二鄉里稱之

謝聰妻楊氏 方氏鄧氏附

按南昌郡乘楊氏新建謝聰妻年二十夫亡無子誓不再適立姪廷和爲嗣娶婦方氏生孫天引而廷和復天方年二十四與姑同志撫天引及長娶鄧氏未幾天引又沒生遺腹子產正鄧年二十二亦終身不二撫產成人嘉靖末俱蒙旌表

方印妻張氏

按南昌郡乘張氏字文娥南昌衛指揮使方印妻新建張明府元春女正德庚午印督兵討姚源盜死難張年二十三聞訃號泣曰夫以死報國吾當以死報夫一慟遂絕救之得甦踰月生子恩盡瘁事姑育恩成立嘉靖間旌表恩後官都督僉事封張太淑人贈夫人

夏才兮妻熊氏

李聰妻范氏

管澄清妻胡氏

按南昌郡乘熊氏豐城夏才兮妻夫亡守志有司旌其門

按南昌郡乘范氏豐城李聰妻夫亡

守志有司旌表

按南昌郡乘胡氏豐城管澄清妻夫亡守志有司旌表

范用志妻孫氏

劉瓊妻吳氏

按南昌郡乘孫氏豐城范用志妻夫亡守志有司旌表

按南昌郡乘吳氏豐城劉瓊妻夫亡守

節事聞旌表

查勛己妻沈氏

按南昌郡乘沈氏寧州查勛己妻性貞淑克執婦道姑患瘋疾出入扶持甚謹親滌穢器無厭年二十九勛己亡哀痛欲殉姑以方娠止之閨旬生子孟常遂撫之成立終身焉

萬民戴妻楊氏

按新建縣志楊氏文學萬民戴妻夫亡孝事舅姑生養死葬盡禮撫二子各授一經長子娶婦相繼沒遺三孤孫楊復教之次第遣入塾受經書後孫翱舉進士氏以壽終

夏世樞妻譚氏

金城妻胡氏

按新建縣志譚氏夏世樞妻年二十六夫亡守貞不二嘉靖間旌表

按進賢縣志胡氏金城妻

知詩書工織紉年二十一夫亡子廷球方晬氏每欲殉夫苦遺孤無託勵志撫育稍長親督課之及遣就外傳家雖貧奉師有禮年四十餘終

陳正道妻鄧氏

況伯珙妻鍾氏

按瑞州府志鄧氏陳正道妻年二十而寡子爵甫四齡姑憐其少令他適鄧矢志不移勤苦持家俾克無墜詔旌其閭
按瑞州府志鍾氏況伯珙妻高安錦水坊人珙亡氏年方二十食貧勵志撫遺腹子成立嘉靖末直指旌其閭

傅舜妻劉氏

按瑞州府志劉氏傅孟春母年十八適春父舜甫四年而舜亡孟春方半歲氏哀毀誓以身殉昏仆不食者數日姑諭節哀撫孤以存夫祀氏勉強從命閉戶辟纁備嘗艱苦春長教之讀書守節三十一年年五十七歲嘉靖乙丑春登進士疏聞於朝旌表

傅應東妻吳氏

按瑞州府志吳氏文端公女名懌貞隨母黃夫人於宦邸納傅應東聘年十六東入京贅焉未暮而應東沒氏痛哭觸棺死而復甦朝夕哀慟不已數請扶柩南還母不可氏曰兒所不死者以姑在諸兄陰令買舟夜半潛出應東柩氏忽夢覺追往扶柩同行時文端方入直報知出朝再四慰諭不聽

因令兄一恂伴歸及抵瑞城過家門不入事姑孝養備至撫嗣子茹荼三十年直指疏請旌表

廖啟通妻吳氏

按瑞州府志吳氏廖啟通妻高安城南人年十七適通數月而通沒舅姑憐其少諭令改嫁氏長跽泣曰婦有遺腹何忍棄之誓死不他適也遂苦節終身直指奏請旌表

廖希中妻周氏

吳一鶚妻朱氏

陳禧妻宋氏

按瑞州府志周氏名鏡貞廖希中妻高安上坊人年十八夫亡守節白首如初事聞旌表

按高

安縣志朱氏名多貞龍山諸生吳一鶚妻年十九撫孤守節子妖復撫孫成名事聞旌表

按高

安縣志宋氏荷山孝廉陳禧妻年二十三禧亡子汝捷甫生五月氏矢志守節事寡姑謝氏敬謹嘉靖間詔旌其門

黃榜先妻朱氏

王思烈側室金氏

余植妻山氏

按高安縣志朱氏名淑貞楓嶺諸生黃榜先妻年二十生子雲龍而榜沒舅姑憐其少令他適朱碎碗自誓甘貧苦節至老不渝嘉靖間詔旌其閭

按饒州府志金氏王思烈側室年二十七夫亡

子慶雲甫晬氏矢志無他家貧備極艱苦寂無怨言卒年四十有七

按饒州府志山氏余植妻

生子未週夫沒苦節三十餘年無病而終

鄭嘉產妻高氏

王尙用妻蘇氏

按饒州府志高氏太學生鄭嘉產妻嘉產早沒高年二十四苦節甘貧教子成立事聞直指旌之壽七十三卒 按饒州府志蘇氏王尙用妻尙用早亡蘇年二十撫孤成立恭儉淑慎內外無間言年七十五卒

甄文明妻胡氏

江宗海妻金氏

按饒州府志胡氏甄文明妻夫亡誓不更嫁苦守五十年終 按饒州府志金氏江宗海妻夫亡撫姪爲嗣守節四十年終

史書褒妻羅氏

按饒州府志羅氏史書褒妻方伯元禎女幼聰慧端莊年九歲卽知女訓及笄歸史克修婦道書褒沒羅年三十二茹苦食貧終身衣布撫五歲子乘古督令勤學膏火不繼每以女紅佐之守節五十